



Repons Bidze 2025 GOUVERNMAN SESEL

**Delivre par:
Minis Naadir Hassan
MINIS POUR FINANS, PLANIFIKASYON NASYONAL EK KOMERS**

**Dan Lasanble Nasyonal Sesel
Ile Du Port, Victoria, Mahe, Seychelles
Vandredi le 08 Novanm, 2024**

Mersi Msye Spiker,

**Msye Spiker,
Dirizan Lopoziyon,
Dirizan Zafer Gouvernman,
Tou bann Manm Onorab e
Tou dimoun a lekout,
Bonzour.**

Msye Spiker, premyerman les mwan remersi bann Manm Onorab pour zot repons lo sa bidze ki monn prezante pour lannen 2025. E parey mon ti ekspekte, de repons vreman diferan sorti kot parti ki dan gouvernman e sorti kot parti minoriter. La mwan ava dir mersi bann manm parti LDS ki war sa travay ki gouvernman pe fer e fondasyon ki i pe mete pour lavenir. Msye Spiker, mon osi anvi dir en mersi spesyal avek parti minoriter pour zot repons. Zot larepons in donn mwan en loportinite fantastik pou demontre avek lepep Seselwa diferans ant en parti LDS ki annan en plan kler e parti US ki napa okenn plan, an efe ni konsepsyon en plan zot napa. Zot sel bi se zis vinn opouvwar pour zot bann lobzektif personel. Lo lot kote ou annan gouvernman LDS ki'n anmenn en plan konpreansiv pou zwenn laspirasyon son pep e osi fer fas avek bann defi e prepar pour lavenir.

Msye Spiker, dan mon larepons bidze mon pou esansyelman fer 4 keksoz. Premyerman, eksplik ek Pep Seselwa diferans ant parti LDS ki anann en plan kler pou Sesel konpare avek parti US ki napa en plan. Dezyenman mon pou adress bokou sa bann rimer, ek fo propaganda ek rimer ki parti US in sey senmen e twazyenman mon pou ilestre ek zot parey tou le lannen mon fer sa ipokrizi Parti US ki zis vinn fer politik bonmarse, popilis e mansonz. Katriyenman mon pou koz brefman lo bann size dan sa bidze ki pou anann en lenpak pozitiv lo ou me ki parti lopoziyon in deside ki sa zot pa pou koz lo la aköz i pa pous son azandan negativ, zot azanda bat latet e zot azanda malonet.

Msye Spiker, Premyerman les mwan eksplike ki mannyer sa gouvernman i konpran tre byen laspirasyon son pep e bann defi ki nou fer fas avek. Ki laspirasyon nou pep? Nou konpran zot anvi en meyer lavi. En lavenir meyer pour zot e zot zanfani. Ki sa i vadir pour nou gouvernman? Nou bezwen kree plis larises pour nou pei, e an retour nou partaz sa larises parmi nou pep. Kestyon se ki mannyer ou kree larises. Larepons i kler, nou bezwen annan devlopman soutenab dan nou pei. Se devlopman ki kree larises. Pou annan devlopman nou bezwen investir. Premyerman, nou bezwen kree en lanvironman ki konvenab pour annan

lenvestisman. Nou bezwen redwir nivo taks e annan mezir taks ekitab pour bann sekter biznes ki nou pe ankouraz zot devlopman. Msye Spiker avek plis aktivite ekonomik ki arive akòz sa, plis reveni taks i ganny ranmase. Se sa fason ki gouvènmman i finans depans bidzeter. Se sa fason ki ou met plis larzan dan pos Seselwa. Msye Spiker, sa gouvènmman i war li enportan pou depans lo bann proze kapital. Akòz?

Pour tou bann ki annan konpetans e leksperyans pou zer en lekonmi i konpran se lenvestisman ki anmenn benefis dan lavenir. Sa ki pa envestir dan son lavenir pou napa en fitir. Parey sa proverb i dir "ou bezwen kas dizef pou fer lonmnet".

Msye Spiker la en gran diferans dan prensip nou ladministrasyon ek sa ki pour US. Nou en gouvènmman ki pe regard pli lwen pou asire ki nou annan en lavenir briyan. Lo lot kote i annan en parti US ki pa get pli lwen ki son bout nennen. Ni en plan, ni konsep en plan zot napa.

Zot en parti ki pe propoze ki Gouvènmman i koup proze kapital, fer monte saler (me zot pann dir par konbyen, pran larzan bidze pey ogmantasyon saler dan sekter prive. Sa mon kwar i en premye. Parey enn zot manm in dir, zot bon lo bann premye zot. Be Sesel pou vinn Premye pei ki gouvènmman ki donn ogmantasyon saler dan son bidze. Enkwayab sa nivo amater!!

Msye Spiker, in pran mon preski 3 erd tan pou eksplik an detay plan gouvènmman pour 2025 e bann lannen ki pe vini. Sa in tous tou kous nou sosyete. Selman ki nou'n war ler nou'n ekout repons parti minoriter? Zis tap kalot dan tou keksoz, kritike, fer distorsyon avek laverite e senm fo lenformasyon. Ser, Frer Seselwa reflesir lo en keksoz. Eski dan larepons sa bann manm parti minoriter zot in ofer solisyon? Eski zot in prezant en plan alternativ? Oubyen zot kontinyelman sant menm retorik – donn larzan, donn larzan e donn larzan, menm sanson eleksyon ki zot in toultan fer. Seselwa annou pa tonm ankor dan sa bann retorik, akòz sa ki ou gannnen ozordi, demen ou pou bezwen repeye e menm ou zanfann e pti zanfann pou bezwen repeye. Msye Spiker si sa bidze 2025 pour US i en Bidze Eleksyon, be mwan mon kapab dir ki depi 2021 tou zot larepons Bidze i bann Larepons Eleksyon. Monn deza dir e mon pou toultan dir zot ki Zot Obsede avek pouvwar ek eleksyon.

Msye Spiker an efe ler mon ekout sa larepons parti minorite, zot plan pour Sesel se koup tou proze kapital e donn plis saler. Sa sel keksoz ki mon tandè. Si mon diskour 3 erd tan ti en rikord, sa ki US osi, ti pou rikord akòz ti pou ladres bidze pli kourt dan listwar Sesel. Ti pou en diskour selman 10 minit akòz ladan ti pou napa

narnyen pou mete. I senpleman fer lapenn kot sa parti in arive. Per fondater i bezwen vreman pe gele ler i war kot zot in anemnn son parti. Senpleman patetik.

Msye Spiker, sanmenm sa mon anvi dir avek tou Seselwa ki Sa parti minoriter ki la dan sa Lasanble, pa konsernen avek Sesel. Zot pa bann patriotik nou pei, me zot plito zis bann Patriotik US. Zot pare pou met nou pei lo son zenou zis pour zot vin o pouvwar.

Msye Spiker, dan repons Bidze, parti minoriter in nonm sa mo 'voler' plis ki 200 fwa. Me parey mon deza dir dan sa Lasanble 'ler ou deza en voler, ou kwar ki tou dimoun i en voler parey ou'. LOTO in dir ki sa bidze i zis mansonz e bat latet. Me Parey monn dir 'ler ou ek ou parti son fondasyon i baze lo mansonz avek bat latet, prezan ou kwar tou lezot i parey ou". Tou le Mardi i pran son letan anmenn en bann PNQ ki ranpli avek mansonz ek bat latet. Ler bann Minis ouswa VP i vinn reponn; glob i pete. PNQ in vinn en fars nasyonal kot tou le Mardi lepep Seselwa i konnen ki parti US pe vin anbaras zot lekor.

Aprezan Msye Spiker, les mwan adres enn de sa bann mansonz ek bat latet ki monn tande pandan sa dernyen 3 zour In annan telman bokou ki si mon reponn ziska demen bomaten nou pou ankor la. Anfet, mon larepons pou pli long ki mon diskour bidze.

E ki nou'n war dan sa repons bidze menm zafer menm. Premyerman i paret zot pann konpran bidze. Dezyenman zot in kanmi aköz sa gouvènmman in anmenn en bidze ki tous kous nou popilasyon e prezan ki zot fer zis senm mansonz pou kasyet zot lakanmizri. Tou keksoz pa bon. Tou keksoz pa ase. *Parti US, zot pe tro vin anmer.*

Msye Spiker dan sa repons mon pou eksplik byen ankor e donn zot lenformasyon ki korek. Ozordi dan nou pei nou'n war en ogmantasyon dan move lenformasyon ek mansonz dan propagann politik. Lepep Seselwa dan sa bann semenn ki pe vini bann teknisyen kalifye pour lo medya pou eksplik zot tou laspe sa bidze. Ekout byen nou bann zenn profesyonel e zot a war lekel sa bann polisye ki koz mansonz e vinn bat latet. I vreman fer lapenn ler ou annan en lopozisyon ki telman fay e konfize ki napa en plan pour nou pei vin fer Seselwa kwar lizour pou aswar.

Annou konmans avek sa bann alegasyon ki'n ganny fer lo SRC. Si i annan lenstans ki okenn biznes i sibir okenn aksyon ki zot kwar i ilegal, vinn devan e lanket ava ganny fer. Me parey labitid parti minoriter in fer bann deklarasyon e zot

sit bann dimoun imaziner ki pa egziste ki pe anvoy zot 'text', ouswa fek zwenn dan distrik. Msye Spiker, sa i en vye trik rakont zistwar. Ou donn en legzanp personel atraver en dimounn imaziner e ou sipoze ganny kredibilite pour sa ki ou pe dir. Parey monn dir Msye Spiker sa i en vye taktik ki lepep i devret konnen. Msye Spiker si sa bann politisyen i annan bann ka reel, mon 'challenge' zot anmenn devan mwan e zot annan mon parol ki aksyon a ganny pran. Selman mon garanti ou, zot pa pou fer li. Sa parti US zot fondasyon i fonde lo mansonz.

Msye Spiker an efe dapre odit ki pe ganny fer i paret biznes ki ti annan asosyasyon pros avek zot gouvernman ki annan bann proteksyon spesyal. I annan lakonpanyen telekominikasyon ki pour 20 an pann pey Tax. I annan biznesmen ki dwa plis ki SR100 milyon taks. Tou sa la bann ki ti vreman tre pre avek parti US. Lepep Seselwa, la en bon legzanp aköz parti minoriter zot oule retourn o pouvwar, pou protez zot bann dalon. Zot in toultan koumsa e zot pou toultan reste koumsa. koumsi sa saying an angle 'a leopard never changes his spot'. Koumsa ki zot in toultan 'operate.' Protez zot dalon, fer bann 'deals' ki dan zot faver e ki sertenman pa dan lentere nou nasyon. Sa parti minoriter Msye Spiker zot bon lo sa bann kalite 'deal'.

Pep Seselwa, sanmenm sa ki nou pou dir avek en lavwa for "There is no turning back'. Nou pa pou retourn an aryer.

Msye Spiker sa zistwar i fer mwan mazin defen Ansyen Minis Larose, kot i ti dir dan sa Lasanble ki i ti menm bezwen al dir avek Prezidan ki kankrela in manz cheques ki'n anmase kot SRC. Lala leta nou pei anba gouvernman US. Kankrela i manz 'cheques'. Apre nou ler nou anmas Taks avek bann gro, gro lakonpanyen, ki zot devwar pou pey taks zot konplent. Sa menm Tax ki pou ganny servi pou pey saler, pey bann benefis sosyal. Anba gouvernman LDS tou dimoun i pey zot tax parey lalwa i demande. Pa parey anba gouvernman US ki serten gro biznezman ek lakonpanyen ti ganny eksli dan pey taks. Sa gouvernman US ki dapre zot bann pli gran Sosyalis dan lemonn ti fer pti dimoun pey taks selman bann gro biznes zot dalon pa peye taks. Pep Seselwa zot asire zot anvi retourn dan sa sistenm? Mon kwar pa! Sanmenm nou pe dir. No Turning Back! Nou pa pou retourn an aryer! Sa ki dan listwar nou kit li dan bin listwar.

Msye Spiker, monn ekout repons 5 bidze depi ki mon'n Minis Finans. Toultan mon'n asize la devan, e ekout larepons bann manm, Msye Spiker, atraver ou, mon kapab konfortableman dir ki sa repons Onorab Spiro i enn pli konfize, pli bizar e pli ranpli avek mansonz ki monn deza tande. Prezan zis mazine in annan enn de repons enpe dan sa menm lalinny ki monn tande. Sa enn in depas zot tou.

Msye Spiker enn bann largiman pli drol ki mon'n dezan tande dan sa lasanble (e monn tann en bon pe dan sa 5 an) se par Onorab Spiro. I dir ki sa bidze bann nimeron i PA reel me selman bann prozeksyon.

Msye Spiker, be byensir i en prozeksyon. Koumsa menm ki en bidze i ganny fer. Reveni ek depans i ganny antisipe. Tou bidze ki'n ganny fer dan tou pei depi listwar bidze in komanse i ganny fer lo prozeksyon.

Sel keksoz mon kapab dir kekfw sa Onorab i kapab vin fer en sesyon avek mon bann teknisyen e bann kot IMF ek lezot ekonomis ki mannyer ou fer en bidze ki baze lo bann sif reel.

Sel keksoz ki mon kapab dir ou - Come on Onorab, Up ou Game! eski sa i vreman nivo diskisyon ler bann teknisyen kalifye i vinn fer prezantasyon bidze.

Lepep Seselwa sanmenm sa bann dimounn ki pe demann ou pou vinn diriz sa pei. Enkwayab e fer lapenn. Ankor Politik bat latet ek politik mansonz. En lot legzanp mannyer fondasyon sa parti US i fonde lo zis mansonz.

Msye Spiker, lo sa menm size, mon anv i dir i normal pour prozeksyon reveni taks diferan avek aktyel. Sanmenm sa ki nou apel en prozeksyon. Selman mannyer zot pe bat lestoman ki sa gouvènmman pa zanmen fer en bidze aktyel ou ti a kwar ki US li toultan ler in fer bidze son bann prozeksyon ti toultan aktyel. Les mwan donn zis 2 legzanp 2 lannen kot prozeksyon reveni taks ti diferan avek aktyel;

An 2013 reveni ti pli ba par SR 246 milyon e an 2019 ti pli ba par SR 66.5 milyon. Onorab Gabriel, Spiro ek Loze eksi gouvènmman LDS ki ti o pouvwar sa letan. Eski mwan ki ti Minis Finans sa bann letan. Ouswa zot pa okouran sa. Me i normal sa. Zot konnen ki zot gouvènmman ti fer ler son prozeksyon reveni i pli ba? , i aziste depans. Akoz lenportans se atenn ou target sirplis fiskal ki enportan. E sa ti ganny fer.

E zis pou note ki reveni taks an 2019 ti SR 7.42 bilyon konpare avek 2023 ki SR 8.17 bilyon. En zoli ogmantasyon sa Msye Spiker. Zot pe akiz nou ki nou pa konn anmas reveni e ki lekonomi ti pli byen anba zot gidans, selman nou anmas plis reveni ki zot. Zot war ki mannyer sa gouvènmman pe travay pou asire ki tou bann ki sipoze pey taks pe peye. Napa tretman preferansyel pour person, parey US i fer. Ou'n anrezistre pou pey taks, ou bezwen peye.

Msye Spiker, Onorab Gabriel, e kekfw sa ki'n ekrir son repons i dir ki sa gouvènmman in toultan mank son bann target fiskal. En lot Pli gro mansonz ankor. Anyways kekfw zot pa konnen ki si sa target fiskal. Les mwan pran sa lokazyon pou edik zot ki si sa target fiskal. Gouvènmman i set son lekor bann target. sa normalman, ki pli enportan se ou diferans ant reveni ek depans san enkli lentere. Sa i apel ou sirplis ouswa defisit fiskal. Lezot target fiskal i enklir Debt to GDP , sa i montre lakantite det ki pei i anann anliny avek kapasite ekonomik pou pey sa det.

Msye Spiker pandan ki monn Minis Finans, noun toultan zwenn nou bann target fiskal. Onorab Gabriel ki Msye Spiker i vin dir ki gouvènmman pa pou atenn son bann lobzektiv. Mwan ti ava kontan konnen lo ki baz i dir sa. Akoz depi 2021 tou target fiskal ki gouvènmman in etabli in ganny atenn. Sa i ganny konfirman par IMF tou le 6 mwan. E sa i en dokiman piblik. Ankor en lot fo lenformasyon propaze par sa parti US.

Sa fo lenformasyon i senpleman en FO LENFORMASYON. Akoz mon oule fer kler ki nou pe zwenn tou nou target fiskal;

Mon kestyon ki mon demande Msye Spiker, Be la lekel ki nou pou kwar? Nou bann Teknisyen kalifye? IMF? Bann dokiman piblik ki IMF i pibliye? Bann dokiman ki Fitch rating i pibliye? Ouswa Onorab Gabriel?

Frer, ser Seselwa, sanmenm ki mon apel politik bat latet, politik masonz. Fondasyon parti US i fonde lo zis mansonz.

Msye Spiker e la les mwan fer tre kler ek sa parti ki mwan, Naadir Hassan ek mon tim teknisyen nou konn fer nou louvraz. Konpare ek sa bann 'wannabee' ekonomist lo lot kote latab ki pey sey vinn eksplik mwan mon louvraz. Parey nou Prezidan i dir. ZOT ANKOR FEB MANRMAY!

Prezan les mwan donn zot bann sif pou defann mon largiman. Akoz mwan mon pa zis vin rabase ek bann deklarasyon ki pa fer sans ou pa fonde. Par egzanp an 2021, nou ti fer en prozeksyon defisit 11.8% balans primer e nou ti aktyelman fer en defisit Selman 3.1% GDP. Savedir nou ti fer pli byen.

An 2022, nou ti prozekte 0.8% defisit e nou ti aktyelman fer en sirplis 0.6%. Nou ti fer pli byen.

An 2023, nou ti prozekte 1.1% sirplis e nou ti fer en sirplis 1.7%. Nou ti fer pli byen.

An 2024, ziska Septanm, nou performans pe montre en sirplis 3.2%. Se sa bann SIF REEL.

Msye Spiker, nou annan tou konfyans ki nou pou atenn sa target pour sa lannen akòz nou annan konfyans dan travay nou bann zenn profesyonel Seselwa ki fer sa bann prozeksyon.

Msye Spiker lo det osi mon pou montre par bann sif ki mannyer nou'n zwenn nou target fiskal.

- An 2021, nou ti prevwar en det to GDP ratio 80.7% e nou ti fini lo 74.0%. Savedir nou ti fer pli byen.
- An 2022, nou ti prozekte en ratio 76.0% e nou ti aktyelman fini lo 69.0%. Nou ti fer pli byen.
- An 2023, nou ti prozekte 64.6% nou ti fini lo en det 60.1% of GDP. Nou ti fer pli byen.
- An 2024, ziska Septanm, nou debt ti 59.5% of GDP. Se sa bann SIF REEL.

Msye Spiker, pandan sa 3 zour, en lot retorik ki parti Minoriter in fer rezonnen dan sa Lasanble, se Bidze 2025 i en Bidze Eleksyon. Les mwan zis fer zot mazine ki mannyer zot, zot in donn bal dan bidze pei dan bann lannen eleksyon zis pour zot reste o pouvwar. Msye Spiker mon pa pou al tro lwen. Annou konmans avek

Bidze 2015/2016 kot ti annan eleksyon ti annan;

- Revizyon e lentrodiksyon dan plizyer 'schemes of service'
- Ogmantasyon 'inducement allowances'
- Lanons konstriksyon lekòl La Rosiere – Huh, sa enn mon a poz la, Msye Spiker.
- Ogmantasyon benefis retret par zis SR150 – En Manman Ogmantasyon SA, pa vre manm parti minoriter?

Dan Bidze 2019/2020 lannen eleksyon.

- Nou war ankor revizyon plizyer 'schemes of service'
- Ogmantasyon saler par 5% - zis 5%, dan en lannen kot lekonmi pei ti pe fer sitan byen.
- Ogmantasyon dan saler minimum
- Ogmantasyon dan benefis retret/dezabilite ek Envalidite

- Alawenns pour bann madanm ansent ki reste lo zil pros ki vin ganny zanfann lo Mahe – Zis SR 1,500 Msye Spiker. Zis SR 1,500. Depi sa lannen, Msye Spiker, sa gouvènmman in ogmant sa alawens pou vin SR 5,000. Onorab Gill avek Uranie, zot pa ti anvè lager pou fer ogmante sa alawens sa letan? Konmsi zis sa SR1,500 ti okay pour zot?

Msye Spiker tou Seselwa i konnen si Bidze eleksyon ti en Parti politik i ti pou Parti SPPF/Lepep/US. Mon kwar sa term ti menm ganny envante pour zot.

Zisteman, Msye Spiker Hon Rocky in koz bokou lo bann alawens ki gouvènmman i propoze pour bann zanfann post segonder. In kritik bann sonm ki gouvènmman in propoze, konmkwa i tro ba. Premyèman; les mwan fer rapel sa Onorab ki alawens zanfann sorti lo zil pou vin lekol post segonder lo Mahe in monte anba nou gouvènmman pou sorti SR 1,400 pou vin SR 2,000. En ogmantasyon SR 600. E de plis, bann zanfann lo sa de zil, pe ganny sans fer zot letid A Level Praslin, olye desann Mahe. De BON Mezir ki sa gouvènmman in enplimante pour sa bann zanfann, NON Onorab? Oubyen PA BON MENM pour ou? Kekfwa sa linet ki Ororab Rocky ti pe rode lot fwa pa ti pou sa madanm imaziner, me pour limenm. Akoz sa manm Onorab pa war naryen. Lopital i fer - i pa war, Por i fer - i pa war, sewage system pe fer - i pa war menm. En pti konsey Onorab, silvouple al fer en tes lizye.

La aprezan les mwan pran sa zafer ogmantasyon alawens i tro ba. Sa i en bon legzanp Msye Spiker pou montre ki kantite ipokrit sa parti US i ipokrit. Dan preski tou mon larepons bidze monk war monn deza dekrir sa parti koman bann Ipokrit, e zot pa zanmen dezapwente.

E wi MNA Loze, monn al rod mon leformasyon akòz mwan mon vinn avek bann fe, pa parey ou ki zis vinn rabase sak fwa ou pran laparol. E wi Msye Spiker mon fer li pou vinn montre lepep Seselwa sa ipokrasi sa kote latab. E ozordi mon pou fer li ankor. Si ou pa kontan 'walk out' parey zot labitid. Laverite i toutan ofans son met. Kanmenm ou'n akiz mwan koman bourbonen, mazorite Seselwa i konnen sel eleksyon ki sa Msye ti pou gannnen se enn pou lekol pli gran BOURBONEN dan sa pei.

Prezan les mwan dekonstrir zot lipokrizi.

- Depi 2011 zot ogmantasyon alawens pour zanfann post segonder in toutan SR 100. Pa desote plis ki sa. Msye Spiker, an 2011, Parti US ti donn en gro

ogmantasyon SR 100 e an 2014 zot ti donn en pli gro ogmantasyon SR 100 e an 2019, 5 an pli tar, zot ti donn manman e papa tou ogmantasyon e sa ti SR 0.

- Ant 2011 a 2013 etidyan sorti direk dan segonder, zot alawens ti sorti SR 750 pou vinn SR 750 rounpi. En ogmantasyon SR 0. Ant 2014 a 2019, zot alawens ti sorti SR 850 pou vinn SR 850. En manman ogmantasyon SR 0. Pour 2020 a 2024, sa in monte par SR 150.
- Pour bann ki pe swiv diplom dan ledikasyon Primer ant 2014 -2019 in ogmante pou sorti SR 1,500 pou ariv SR 1,500. En lot gro ogmantasyon SR0. La in ogmante par SR 200.
- Pour bann ki pe swiv diplom dan ledikasyon segonder sa ti sorti SR 2,000 rounpi pou ariv SR 2000. Ankor en gro ogmantasyon SR 0. La in monte par SR 200

Msye Spiker, zis gete mannyer sa parti i ipokrit, ler zot ti dan gouvènmman zot ti'n kapab ogmant sa bann alawens, me ki zot in fer? zot in bliye si sa bann alawens ti la, e ler zot in mazinen, zot in, konmdi zot menm 'larg en pti mwenz' par donn en ogmantasyon SR100. Sa in zot patern ki zot in etabli. La prezan zot pe kriy pa ase, donn plis. Be donn plis ti'n devret konmans avek ou parti Onorab.

Parey mon koleg Minis Devika in dir zot resaman 'Be zot ti la zot. Akoz zot pann fer'.

E mwan ozordi mon reponn sa kesyon pour zot. Zot pann fer akoz zot enkonpetan e napa en leker pour nou bann zanfàn Seselwa.

Msye Spiker, mon pa ankor fini pou montre Seselwa lipokrizi parti US. Zot pli gran lipokrizi i avek alawens bann 'mature student'. Ant 2009 a 2019, zot alawens ti sorti SR 1,800 pou ariv SR 1,800. Ankor en gro ogmantasyon SR 0 pandan 10 an. La sa alawens pe al monte pou vin SR 6,250. Sa en pti pti logmantasyon kakayonyont, SR 4,450. En zoli ogmantasyon sa, Onorab Uranie. Pa ase menm pour ou? Konbyen zot in donner zot? I paret ankor ennfwa zot ti'n oubliye ki ti annan sa group etidyan ki ti merit en ogmantasyon. Ipokrissi dan tou son splander.

Msye Spiker, parti minoriter i devret kontan avek sa ogmantasyon akoz seryezman mon war zot an 2025, zot pou retoun dan laklas pou ganny 'reskill' koman bann mature students. Sa zoli ogmantasyon ava ed zot.

Msye Spiker, lo kote ogmantasyon dan benefis retret. Ankor les mwan repete. Premyerman sa group in ganny klasifye dan 3 kategori. Sa ki napa en pansyon avek Fon Pansyon. Sa ki ganny en pansyon minimonm SR 3,000 – sa i en pansyon ki gouvènmman i deza pe sibvansyonnen e sa dernyen group i sa bann ki annan en pansyon avek Fon Pansyon.

La, sa ogmantasyon ki zot pe al gannyen an Avril 2025, i asire ki mazorite pansyonner i ganny en ogmantasyon minimonm SR 400.

Sa ki fer sa diferans dan kantite sekirite sosyal ki zot pe gannyen avek gouvènmman i senpleman sa Lasistans Tanporer ki gouvènmman ti pe donneren depi 2022. Sa sonm ki ti donneren ziska en lavalè SR 500 in ganny enkorpoze ouswa konsolide dan sa sekirite sosyal. Savedir Msye Spiker, anba sa lasistans tanporer si en dimoun ki son benefis retret pa ti ariv SR 9,000 akòz par egzansp i ti pe ganny ZIS sekirite sosyal e i ti napa en peyman avek fon pansyon, sa dimoun otomatikman ti ganny maksimòm sipò ki SR 500. Alor sa lasistans pou aprezan ganny enkorpoze avek sa sekirite sosyal SR 5,750 ki fer i vin SR 6,250. Aprezan an Avril, i pou ganny en ogmantasyon SR 400 ki fer i pou ganny SR 6,650.

Parkont bann ki ti pe ganny sa lasistans tanporer, sirtou sa group ki ganny sa fon pansyon minimonm SR 3,000, sa i vèdir ki zot ti pe ganny SR 250 anba sa lasistans tanporer. An Avril sa sonm pou ganny enkorpoze dan zot sekirite sosyal ki zot zot pou ganny SR 6,000, e ler ou azout sa SR 400 I fer zot ganny SR 6,400.

Aprè Msye Spiker, i annan sa group ki zot, zot pan gannyen sa lasistans tanporer akòz zot benefis retret ansanm avek zot fon pansyon ti plis ki SR 9,000. Zot sa group, An Avril zot sekirite sosyal pou sorti SR 5,750 pou vin SR 6,150, ankor en ogmantasyon SR 400.

Se sanmenm sa leksplikasyon ki monn donneren dan mon diskour bidze Zedi pase, me la monn al dan plis detay, akòz en bann pe pran plèzir pou senm fo lenfòmasyon sa benefis retret bann dimoun aze.

Msye Spiker, avek sa leksplikasyon ki mon swete i kler, sa i montre ki sa ogmantasyon i SR 400 ‘across board’. Sa bann diferans se tou senpleman akòz sa lasistan tanporer ki PA tou pansyonner ki ti gannyen in ganny enkorpoze dan benefis bann ki ti pe resevwar li. SE TOU.

Alors sa bann US ki’n vin sant sanson ki sa lasistans tanporer in ganny tire, mon senpleman kapab dir zot; Sant en lot tune. Akòz sa I FO. I en FO rimer. E la US in kanmi ki zot fo lenfòmasyon ek rimer in ganny debiste, e sel rekour ki zot pe sot

lo la aprezan, pran kredi pour sa ogmantasyon. Sa ki'n vin dir dan Lasanble, ki nou'n taye pou pa koup sa lasistans tanporer aköz zot, zot in met presyon lo gouvènmàn, les mwan dir zot klerman mannyer zot koz mansonz.

E la Lepep ekout tre byen. Premyèrman, sif bidze in ganny pibliye i annan 3 semenn pase. Sa sif pour sa ogmantasyon spesifik in osi pibliye 3 semenn pase. Sa sif ti dan mon diskour bidze ki mon ti delivre Zedi pase pour en sonm SR 121 milyon.

Anplis, mwan - Naadir Hassan - depi ki monn Minis pour Finans, si i annan en keksoz ki mon pann zanmen fer e pa pou zanmen fer, se pran zot presyon. Aköz mwan, mon pa pou zanmen pran presyon sorti kot en parti minoriter divage dan zot fason fer e fason panse. E mon kwar dan sa 4 an zot in konn mwan byen. MON PA PRAN ZOT PRESYON. Konmsi koze, pran zot presyon e met li kot...

Msye Spiker zis pou fer rapel ki benefis retret in toultan mont par en pti SR 50 a lokazyon laniverser sa gro msye. Sel letan ki'n annan bann ogmantasyon sibstansyel se dan bann lannen eleksyon, parey an 2015 e 2016 e osi 2019 e 2020. Zot fer byen zwe lo moral bann pansyoner pou ganny vot. Me sa ki gou se pandan sa bann lannen zot popilarite ti'n fini konmans degrengole. Seselwa ti konmans debiste zot ki mannyer zot zwe lo moral avek larzan bidze.

Aprezan, annou get en kou ogmantasyon saler. Sa osi pa ase pour sa parti minoriter. Dan mon diskour bidze mon ti donn 3 legzanp mannyer sa ogmantasyon pou benefisye 3 group spesifik: En Housekeeper, en staff nurse ou ansennyen e en graduate.

1. Annou pran premyèrman sa Housekeeper ki dapre dernyen ogmantasyon saler US an 2019, sa ti sa 5%, son saler de baz ti sorti SR 5,788.00 pou vinn SR 6,206.00 apre ki zot ti reganny plase lo grid saler, e zot 5% ti SR 310.30. En ogmantasyon zis SR 728.30. Anba gouvènmàn LDS sa Housekeeper in benefisye 2 fwa avek en ogmantasyon saler. Premyèrman an 2023 avek en ogmantasyon 10% ki ti pous saler debaz laplipar housekeeper ziska SR 7,567 e la avek sa 7% ogmantasyon pou saler pou vinn SR 8,097. Get ladiferans Msye Spiker. En ogmantasyon SR1580.70 dan 2 an. US li ti donn ou SR 728.30. Enkrwayab.
2. Dezyenman saler debaz en 'staff nurse' – an 2019 avek sa ogmantasyon 5% son saler debaz ti sorti SR 7,364.00 pou vin SR 11,401.00, apre konsolidasyon retention alawens. Zot vre logmantasyon ti Selman SR 1,607.05. Ankor ennfwa avek sa 10% ogmantasyon an 2023 avek

konsolidasyon sa 4 alawens, saler debaz sa ‘staff nurse’ in vin SR 13,204 e la avek sa nouvo ogmantasyon 7% sa pou vin SR 14,128. US ti donn ou en logmantasyon 1,607.05. LDS in donn ou en logmantasyon SR 2,375.72 dan 2 an.

Sa i Selman de legzanp Msye Spiker.

Msye Spiker, zis get ladiferans dan ogmantasyon saler de baz pour zot menm. Avek sa revizyon ki nou gouvènmman nou’n fer kot nou’n konsolid 4 alawens dan saler de baz ozordi peyman trezyenm mwan i bokou plis pour tou dimoun. Savedir travayer pe benefisye avek en ogmantasyon lo zot peyman trezyenm mwan. Akoz li US pa ti enkli alawens dan ou kalkilasyon 13 enm mwan.

Samenm ki apel ipokrisi dan tou son splander.

Msye Spiker, avan, mon fini avek sa zafer fo rimer, Onorab Cosgrow, mon bon dalon i fer lapenn pou sorti Minis pour ou ozordi vin fer politik Margarin. Onorab les mwan dir ou ki STC i vann 2 groser bwat margarin. Enn 250g e lot ki pli gro 500g. Ou dir ki pri in sorti R18 pou vinn R38. Onorab ou pe konfize. Amwen ou pa abitye al kot STC pou fer ou shopping. Msye Spiker ou konnen ki sa Onorab in fer? In pran pri aktyel sa bwat 250g ki SR 20, apre vin dir ki in ogmante pou vin SR 38, ki pri aktyel sa bwat 500g. Onorab, GET YOUR FACTS RIGHT. Ma ed ou, sa bwat margarine Remia 250g - son pri i SR 20. Sa bwat 500g son pri - i SR 38. Ou’n konpran diferans ant en bwat 250 e 500g. Ou konpran Onorab. Ankor ennfwa senpleman Enkwayab!!!! Fransman mon ti pros pou vin la bomaten avek de bwat Margarine Remia, pou montre ou diferans ant sa enn ki 250g e lot ki 500g. Parey monn dir Msye Spiker, politik masonz e politik bat latet.

An plis Msye Spiker, konsomater i annan swa maragarine, akoz kot STC i annan en lot brand margarine ki apel ‘Ona’ ki kout selman R10.55 kot hypermarket pour en bwat 200g. Enkwayab manyer sa bann zans i vinn distort realite ek zot bann fo propaganda.

Ser/Frer Seselwa. Annou bliy sa bann fo rimer, fo propagann sa parti minoriter. Akoz parey monn dir fondasyon zot parti i fonde lo mansonz.

Msye Spiker, les mwan adres sa size Proze Kapital ki Parti US in deklar en lager asarne kont. Mwan pou poz lepep Seselwa detwa kestyon pou zot reflesir lo la akoz i enportan pour nou konpran lenplikasyon sa polisi parti US ki pou annan lo zot.

- Ou sa motoris ki pri dan trafik dan bomaten ek aswar dan distrik Anse Royale, Au cap, Anse Aux Pins, eski ou ok avek sa pozisyon ki ou kontinyen gat ou letan dan trafik pou al travay e retourn se ou? Eski ou ok avek gaspiy benzinn dan konzesyon trafik? Mon mazine kekfw sa pti saler anplis ki US li ti sipoze donn ou, ou a servi pou pey sa drayver ki devan ou pou les ou pas devan e kontiyen fer sa ziska ou ariv dan lavil. Mon kwar ler ou'n ariv anvil sa saler pou'n fini e ou pou bezwen al pran 'loan'.
- Ou sa ansennyan La Digue ouswa sa paran e menm sa etidyan eski ou ok ki nou pa refer zot lekòl? Eski ou ok pou travay dan sa kalite kondisyon kot sa lekòl, eski ou sa paran ou ok pe mazine si tanto ou zanfàn pou vinn kot lakour e si batiman pann tonm lo li? Akòz zot MNA li i ankor pe esper en pti alawens pour en linet, akòz sa Msye i vreman pa war kler. Proze lopital i pa war, proze sewage i pa war kler, proze por i pa war kler. La proze semen pou al konmanse. Msye Spiker sa Gouvènman pou kontinyen pou envestir pour La digue, akòz i kontan La Digue. Pa parey sa bann ki zis koz La Digue bon labous selman nanyen pann ganny fer pour sa zil anba zot watch. Zot selman en bann MNA seremonyal e boycott.
- Ou sa enportater ki konplent ki tro bokou letan i pran pou 'clear' ou 'container', ou ok pou napa redevlopman Por? Ou sa travayer Por eski ou ok ki ou pa santi ou dan sekirite ler ou pe travay akòz por pe degrengole?
- Ou sa motoris ou pyeton ki pas semen North East Point, Au Cap, Port Glau, eski ou ok ki gro laroul i mont lo semen e pouri ou transpor ouswa ou sa pyeton ki ganny mouye ler ou pe al travay ou ok pou kontinyen koumsa.? Eski ou pou pran sa pti saler anplis ki US i sipoze donn ou (E parey mwann ilistre avan zot zis koz donn ou plis saler, selman ler zot ti la zot ti ganny zis R200-R300) pou aranz ou loto ouswa met lo ou latet pou anpes delo sale mouy ou?
- Ou sa zabitan Baie Lazare, Anse La Mouche, Takamaka, eski ou ok pou kontiyen servi sa semen ki menm en bisiklet i ganny problem pase lo la? Ouswa sa sirfas semen ki wa dir ou pe pas dan laroul vann swet e kas ou loto? Ouswa ou ki pran bis, ler i pas dan sa bann semen ou a dir ou bezwen met 'shock absorber' dan ou leren. Ou ok pou kontinyen pran bis kot napa en 'bus shelter' e lapli i mouy ou oubyen soley i griy ou?

Wi, Msye Spiker, se sa ki parti US pe lager pour ou pep Seselwa. En parti ki pe sey zis vin bat ou latet. En parti ki pe fer nou kwar lenvestisman pa enportan. Ser/Frer Seselwa pli ou ekout sa bann zans, pli nou konpran akòz Sesel anba zot direktiv in fait de fwa. Les mwan reasir pep Seselwa ki pli gran keksoz ki en gouvènman i kapab fer, se envestir dan lenfrastriktir ki son pep i anann. Sa i fer lavi son pep pli

byen. Pa bliye ki proze kapital i vedir ki nou bann biznes i ganny plis louveraz, zot anploy plis travayer.

Msye Spiker, i mon devwar pou edik parti minoriter aköz ou bezwen investir dan bann proze kapital. En la mon pou met li dan en fason pli senp pour zot kapab konpran. Dan nerport ki laspe lavi se lenvestisman ki anmenn ou prosperite dan ou lavi. Mwa eksplike:

- Ou sa endividi, ou investir dan en lakaz pour ou reste ladan aköz i donn ou labaz pour ou vin en lavi konfortab e stab e sa i donn ou sa sans pou fer en lavenir pli briyan. Eski ou pran ou larzan e ou reste ladan.
- Eski zot pe dir en drayver taxi fer en biznes Taxi san annan en loto ouswa semen pou pas lo la.
- Eski zot pe dir sa peser fer biznes lapes selman pa aste en bato lapes.

Msye Spiker, sa bann legzanp i sitan senp, me i enportan pour mwan montre ki mannyer ridikil sa bann largiman US i ete. Zot konnen ki sa ki zot pe dir pa posib e laprev i la aköz dan 43 an zot in depanse dan proze kapital. Msye Spiker sa in montre ou en sel keksoz. Lopozisyon in vinn donn en repons, popilis, en repons bat latet e en repons mansonz. En parti ki zot fondasyon i fonde lo zis mansonz.

En lot zafer ki sa parti minoriter i koz lo la se proze kapital ki pa ganny materyalize. Annou zis get dan zot bidze bann lanons detwa proze kapital ki pann materyalize:

- En nouvo lekol Teknikal Nasyonal lo Ile Soleil
- En nouvo lekol pour Lakademi Letid Biznes Sesel ek Lenstiti pour Lar ek ‘Design’ lo Ile Aurore
- Dezyenm faz proze Ile du Port, prensipalman pour bann travay semen, drenaz ek travay elektrisite
- Rekonstriksyon kordgard La Digue
- Rekonstriksyon Lopital La Digue
- Rekonstriksyon Lekol La Digue
- Rekonstriksyon kordgard Baie Ste Anne Praslin
- Day Care – Onorab Georges, ou pe ganny promet sa day care Les Mamelles – se an 2024 ki pyer fondasyon pe al mete.
- reabilitasyon e lagrandisman Por Komersyal Victoria
- konpansasyon bann rezidan Baie Ste Anne Praslin ki’n ganny afekte par stasyon elektrisite. Sa i en ka depi 2017 – Onorab Gill, lekel ki’n onor sa promes eleksyon ki ou gouvènmman ti fer? Gouvènmman LDS. Omwen admet ki sa gouvènmman in omwen fer en pti keksoz bon pour ou voter.

Msye Spiker, La les mwan kit en lot kesyon pour zot reflexir lo la. Akoz ki US ler li i ti o pouvwar i pa ti koup tou bidze kapital e donn bann gro gro ogmantasyon saler? Kekfwa Onorab Cosgrow i kapab donn nou en larepons aköz lezot napa leksperyans gouvènmman. Omwen Onorab edik ou bann koleg ki mannyer en gouvènmman i fonksyonnen, olye les zot vin anbaras zot lekor. Petet, kekfwa ou kontan ler ou war zot pe fer bann largiman foubet.

Antou leka Msye Spiker, nerport fason ki ou analiz sa bann deklarasyon lo lenvestisman dan lenfrastruktir ou Selman kapab tonm lo en konklizyon, parti minoriter zot bon lo fer politik bon marse, politik bat latet e politik masonz. Ankor ennfwa sa parti US i en parti ki zot fondasyon i fonde lo zis mansonz.

Konpare avek lopoziyon ki zis fer bann deklarasyon san okenn levidans e statistik e largiman lozik ou annan en plan konkret, zot zis fer en ta tapaz parey bann barik vid, mwan mon pou eksplik zot byen plan gouvènmman e defi ki Sesel pe fer fas avek.

Ozordi, mon pou donn detwa sekte koman priyoriter ki sa gouvènmman in idantifye. Lenvestisman dan bann mezir pou adapte e fer fas avek sanzman klima. Resours signifikan par lao SR 115 milyon in ganny donner pour amenazman semen lo lakot, e mezir pou protez nou lans ki Seselwa ek Touris i servi. Msye Spiker, en plan transformativ pour nou sorti lo lenerzi ki ganny prodwir avek karbiran e bouz lo lenerzi renouvlab. nou pe met resours pour PUC amelyor son grid distribisyon, nou'n met an plas kad regilatwar pour bann PPP avek sekte prive pou prodwir plis elektrisite renouvlab.

An plis ki sa, nou pe ankouraz tou lakour rezidansyel pou enstal sistenm pano soler kot aprezan zot pou ganny en rediksyon ant SR 10,000 a SR 30,000 Pti biznes osi pe ganny sans benefisye avek sa bann 'incentive'. An plis ki sa gouvènmman pou donn ou akse ek en fasilite 'loan' sibvansyonnen. E pa bliye sa pou ed ou redwir ou kou elektriste pour ou lakour ek ou biznes. Msye Spiker si sa pa en plan, dir mwan kwa ki en plan.

Me, in napa en fwa pandan sa 3 zour ki okenn manm parti minoriter in koz lo sa linisyativ e ankouraz Seselwa pou sezi sa loportinite pou fer desann zot pri elektrisite. Sa pa en bon linisyativ pour zot voter? Sa pa en bon loportinite pou ede fer zot depans desann? Sa pa en bon plan pour nou pei, an sa ki konsern redwir nou depandans lo karbiran ki nou enporte? Sa pa en bon plan pou met plis larzan dan pos Seselwa aköz ler zot pri elektrisite i redwir, i vedir larzan anplis dan ou pos.

Olye analize kwa ki bon dan sa bidze pou kapab ed zot bann voter e diriz zot ver sa bann loportinite, zot, zot tou zot in ganny kondisyonnen avek sa lanmertin ek negativite. Tou keksoz pa bon, napa naryen ki pe marse dan sa pei. Napa naryen pozitiv dan sa bidze. Ki mon kapab dir zot, kontinyen lo sa menm semen. Mon sel lapel pour zot sipoter, analize byen lekel ki oule kit ou dan fernwanr. Akoz nou dan gouvènmman noun met 3,450 lalimyer partou dan bann distrik. Plis ankor pe vini. US i le kit ou dan fernwar. LITERALMAN!!

Msye Spiker, en lot sektè prioriter i Transformasyon ekonomik. Lenportans en tel stratezi se pou kree plis larises pour nou dimoun e pei. Sanmenm nou pe kree plis later avek sa proze reklamasyon ki pou prodwir plis ki 40 ekter later pour bann pti biznez. SLA in ganny mandate pou retir sa bann lapayaz ki ekziste ler ou al fer en biznes. Biro Minis Lenvestisman, Antreprenarya in pran responsabilite sa proze. Bann pti lanpir kin ganny kree anba gouvènmman US ki met retar avek lepep Seselwa ler i anvi fer biznes pe ganny kase. Bann 'tax incentive' pour bann sektè ki gouvènmman i war posibilite pou agrandir pou osi ed sa bann sektè parey finans, nimerik, lekonomi ble e lezot. Msye Spiker sa i en plan ki vinn avek mezir spesifik. Msye Spiker enn bann pli gro proze kapital se proze reklamasyon. Sa i pou kree plis later endistriyel. Bokou nou bann biznes pe rod plis later pou fer zot biznes e anvi ki US ler i partaz bann bout later avek zot bann dalon, manm parti ek MNA, nou war nou prezan bezwen fer plis reklamasyon pou ed ou sa pti antreprenèr pou ganny en pti bout later. Me US i dir ek ou, NON nou pa oule plis proze kapital. Ou war mannyer zot egoist. Zot zot in fini ganyen, prezan ou demerd ou!! Enkroyab.

Msye Spiker lo bann problemn sosyal ki'n fleri anba sa ansyen gouvènmman i osi en travay kritik ki bezwen ganny fer. Prezidan in fer li son latas personel pou lager kont bann ki anmenn drog Sesel. Anba son ladministrasyon i annan en rikord lakantite drog ki'n ganny sezi. Ou demann ou lekor akòz pandan sa bann deseni naryen pann gany fer. Sa program pou adres 'Youth at risk' i met en plan konkret an plas pou asire ki nou bann zenn ki fer fas avek bann defi sosyal i annan en lankadremman pou asire ki zot kapab fer fas avek sa. Mon a demann mon lekor akòz tou sa la pann ganny fer pandan sa 43 an, la nou nou bezwen fer li. Minis Francourt i dir mwan koman en konsiltan plizyer lannen pase in anmenn sa kot ansyen cabinet. Naryen pann gany fer! Ankor la, dan larepons ou demann ou lekor oli zot plan? Naryen pann koze lo zot plan pou adres sa bann defi. Kekfwa mon mazin en parey pandan sa 43 an zot ti napa en plan e enpe bokou pou demann zot pou fer en plan pour en problemn ki zot menm in kree.

Msye Spiker, nou pe kontinyen envestir dan lasante nou nasyon e ledikasyon nou zanfan. Bidze sa de sekter depi 2020 in kontinyelman ogmante. An 2020, bidze Lazans Swen Lasante ti zis par par lao SR1 bilyon. Pour Ledikasyon sa sonm ti SR 944,281 milyon. An 2025 bidze HCA pou SR 1,321,694 e Ledikasyon pou ganny SR 1,355,076 bilyon. Finansman pe ganny mete dan sa de sekter, e parey monn dir dan mon diskour bidze Zedi pase, gouvènmman pe fer son bout, se bann ki pe benefisye avek sa lenvestisman ki bezwen sezi loportinite ki zot gannnen. Nou tou nou bezwen fer nou bout.

Msye Spiker, ensize ki okenn manm onorable US pann koz lo la se sa reform tax PIT ki pou fer ou soumet en tax return e baze lo bann depans ki ounfer, parey lekòl zanfan ki ou peye, lentere lo loan lakaz, medikal ki oun peye, depans lo swen medikal, ou pou kapab ganny en refund lo ou tax ki ou peye. Pa en bon keksoz sa Msye Spiker? Sa gouvènmman i osi pe get en kous popilaayon ki plizyer lannen ansyen Gouvènmman i bliye. Sa bann ki dan zot prop pos i debouryen e envestir dan zot fanmiy. Eski pa en bon keksoz sa?

Onorab Woodcock, wi monn war sa fo propagann ki sa nouvo parti pe fer. Ankor sa ki zot pe dir i FO. Pep Seselwa ou pou kwar mwan ek mwan twa teknisyen sinyor ki la ouswa sa politisyen?

Mazinen nou trwa la nou sertifika i otantik. Nou'n pann zanmen santi li nesese pou al en sertifika 'fake'. Ankor zot tou zis bann politik bat latet.

Msye Spiker, parti minoriter in koz bokou lo kou lavi, lo lenflasyon. Wi Msye Spiker sa i reste en konsern dan tou pei. E monn dir e pou toultan dir lakle adres sa problem se nou bezwen a lon term kontinyen travay dir pour ki nou lekonmi i prodwi louvraz ki pey byen.

Me annou pran en moman pou reflesir lo kou lavi. Msye Spiker les mwan eksplik sa bann gran gran ekonomis lo sa kote latab parti minoriter lo kou lavi e lo lenflasyon.

Msye Spiker, kou lavi i ogmante ler pandan plizyer lannen ou nivo lenflasyon i O e ogmantasyon dan saler pan reste anliny avek ogmantasyon. Sa i lakoz en sitiasyon ki envantelman fer vinn kou lavi O. E les mon ilestre sa avek bann statistik ofisyel pou demontre ki manyer pri lavi in monte e lekel ki responsab.

Msye Spiker, to lenflasyon an 2008 ti 37%, an 2012 ti 7.1%, an 2018, ti 3.7%, an 2020 ti 9.8%.

Saler li pan zanmen mont lo menm nivo parey lenflasyon. Parey mwan montre pli boner, saler li ti mont par R200 a R300.

Anba nou ladministrasyon lenflasyon an 2022 ti 2.6%, an 2023 ti 1 % e an 2024 ti 0.6%. Lapey li in mont an mwayenn 17%.

Msye Spiker la lakoz nou kou lavi. Se US zot menm ki pandan 43 an in fer kou lavi eleve.

LDS li dan mwens ki 4 an pe sey aranz zot kales kase ki zot in kit deryer.

La ozordi zot annan lodas pou koz labous plen lo kou lavi.

Msye Spiker, mwan mon konnen ki zot napa sa abilite pou konpran sa bann konsepte teknik e rol ki zot in zwe pou koz kou lavi pou vinn O.

Be Msye Spiker, ler ou pa konpran en keksoz silvouple, plito pa koz lo la, akòz dan premye lye ou menm ou, ou pa konpran ki ou pe sey eksplike.

Msye Spiker, les mon adres en kritik konsernan etranze ki gouvènmman in anploye. Wi Msye Spiker kot nou bezwen led nou admet e nou rod led ki nou napa. Me toultan nou bezwen mazin ki sa en solisyon tanporer, e plan permanan se pou prepar en seselwa ki dan 2 an a pare pou pran sa rol. E la les mwan reasir tou Seselwa ki dan tou sa bann lenstans en Seselwa in ganny idantifye. Dan kontra tou sa bann etranze i annan en lobzektiv pour zot prepar en Seselwa. Msye Spiker sa i diferans ant nou avek gouvènmman avan. Nou napa okenn plan pou fer sa bann etranze vin Seselwa parey zot, zot ti fer ler zot ti dan gouvènmman.

Msye Spiker in annan en MNA kinn kritik sa propozisyon pou etabli en lakour komersyal. Son leksplikasyon se ki sa pou met dimoun ek biznes dan plis problem. Ankor en largiman pa fer sans. Zot menm zot koz ‘ease of doing business’ e ler ou fer bann propozisyon pou amelyore, pour zot pa bon menm.

Les mwan eksplike ki mannyer en lakour komersyal i amelyor ‘ease of doing business’. Sa i en fason pou asire okenn ka pa pri pour plizyè lannen e en desizyon i ganny pran pli vit posib. I premye fwa mon tann en largiman ki pous en pozisyon ki ankouraz retar dan pran dezisyon legal. Ankor ennfwa Enkwayab. Plis lipokrizi ankor.

Msye Spiker, an 2012 en regilasyon ti pibliye avek lentansyon pou etabli en lakour komersyal. An 2012 lekel ki ti ou pouvwar? Eski zot vreman pa konnen ki’n arrive dan zot prop gouvènmman. Ozordi zour zot pli rwayal ki lewa. Mannyer zot

fer, Ou a dir zot en parti kin sorti lo lalinn e tonm Sesel an 2020. Sa ki'n pase dan gouvènmman avan 2020, zot, zot pa responsab. Zot pa ti la. Zot pa O kouran. Selman sa kalite konpòtman pa devret sirprann nou akòz ziska prezan zot in refize demann pardon sa pep pou atrosite ki zot in komet pandan zot letan o pouvwar. Ankor ennfwa senpleman Enkwayab.

Msye Spiker, an konklizyon, mon anvi dir avek tou Seselwa ki Sesel anba gouvènmman LDS I lo bon semen. Laprev i la! Fondasyon nou lavenir in byen batir e i for. Aprezan i depan lo sakenn de nou pou fer nou bout pou kontinyen batir lo sa fondasyon. Nou lavenir i asire e briyan avek en gouvènmman LDS ki responsab e ki partaz avek nou tou, ler lekonomi i fer byen. Ozordi nou sikse i ganny rekonnet atraver lemonn. Ozordi sa pti Sesel pe kit son mark dan sa lemonn global. Annou kontinyen get Delavan. Sa sikse pandan sa dernyen 4an i gras a travay nou tou, ki'n fer son bout. Nou Laliberte ki nou pe zourir ozordi, nou pa pou les okenn parti politik rebran avek nou. Lepep Seselwa, oum lager 43 an pou tir sa bann move dimoun o pouvwar. En lalit ki bokou in fer bokou sakrifis. Sa ki'n ganny anprizonnen parey mon defen papa, sa ki'n ganny zot disan verse, sa ki'n disparet e sa ki'n ganny touyen. WI ou sa zenn pran ou letan aprann nou listwar, akòz bokou in ganny sakrifye pou ou zourir sa laliberte ki ou anann ozordi. I annan en saying angle ki dir 'freedom is not free'. Annou pa les sakrifis sa bann ki'n vinn avan nou vi'n pour naryen. Akòz si ou deside pou reste lo kote e les sa arive ou ki pou pey lekonsekans. Ou inaksyon pou annan son konsekans. Bann move dimoun i ankor la, zot ankor pe konplote pou vinn pran ou laliberte. An 2025 enn fwa pour tou - dir ek zot zanmen ankor. Zanmen nou pou retourn anver viktimizasyon, zanmen nou pou retourn dan fenrwar, zanmen nou pou retourn anver diktater. 'Seselwa sekwe nou pa les zot bat nou latet' e zanmen les laliberte sanz direksyon.

Zis mazin si nou kontinyen lo sa menm larout ki mannyer nou pei pou devlop plis ankor. Eski nou oule retourn an aryer? Mon kwar depi 2020, nou'n fini pran en desizyon. Sa parti minoriter fodre nou ennfwa pour tou zet zot dan bin listwar. Sa Gro ros in degrengole, sa nayaz nwar in sorti lo Retourn an aryer, zanmen ankor. Msye Spiker nou pe get devan. There is NO TURNING BACK. Parey mon zanmi George Payet i sante annou fer li "Pour Sesel."

Ki bondye i beni nou pei e son Pep. Ki i protez nou kont tou bann ki ankor swet sa ki mal pour nou pei. An 2020 Bondye dan tou son sazes ti ekler nou e retourn nou laliberte kot nou. E mon asire i pou kontinyen fer sa.

E parey nou vedet lanmizik Msye David Andre i dir dan san sanson mon fini ek sa Msye Speaker 'Sesel mon Sesel nou pa pou zanmen les ou tonbe'.

Mersi Msye Spiker.